

## 臺北集

### 七言古體

#### 西門紅樓

西門町上長佇立，對望紅樓憶前因；日匠當年興市集，絳磚青瓦色榮新。  
雕樑雲起迎官貴，喧闐過市車鞦韆；何奈煙花易冷落，寂寞門前卻少親。  
重喚東風復旖旎，綺閣艷陌競青春；日日歡客來無已，遊冶濃情走芳塵。  
風采百年唯想像，回眸何異夢中身；訪幽為樂誰似我，長是紅樓夢裡人。

### 五言古體

#### 劍南蝶園

劍南蝴蝶邑，絕塵一境幽；艷麗逐香舞，斑斕載春遊。  
喜甚多復育，善者從如流；愛蝶休網捕，栽花為君留。  
翩翩情深摯，逍遙性自由；長憐化梁祝，不願夢莊周。

### 七言律詩

#### 江山樓舊址

江山樓外改江山，樓上繁華豈可攀；饌玉生涯殘漏促，歌詩歲月落花閒。  
雕欄已壞人難倚，舊址空存春不還；多少風流今泯滅，幽懷徒令髮成斑。

#### 文萌樓

藝姐悲歡添一章，稻埕風月箇中嘗；浮雲易散煙花地，落日難留歌舞場。  
憔悴紅顏金谷酒，消磨綠鬢綺羅香；辛酸誰解憐身世，憫對文萌莫笑娼。

#### 東區夜店

眷戀京華愛晚芳，東區蒞此暫荒唐；霓釭旖旎春長駐，玉漏遷延夜未央。  
快意何妨歌一曲，歡情莫吝酌千觴；淺斟低唱浮生夢，且認醉鄉為故鄉。

#### 平溪天燈

日落山城豈寂寥，平溪欣羨鬧元宵；春妝煙景邀青睞，夜放燈輝上碧霄。  
白紙願題人健在，黔黎福禱歲豐饒；似星如夢高飛去，心底餘光未盡消。

### 淡水夜遊

夏夜清幽此奪魁，忘形水岸樂相催；波聲萬頃琉璃碎，燈影千般羅綺瑰。  
潮逐繁華空起落，岑招隱逸獨來回；孤行何患無佳伴，錦繡江山長作陪。

### 101 大樓跨年夜

最是良辰第一流，呼來萬姓盡凝眸；煙花煥發三春色，火樹高明百尺樓。  
不待雞鳴新歲至，猶聞炮響舊愁休；前塵昨夜風雲逝，來日須珍在手頭。

### 夜訪故宮

千秋瑋寶夜無眠，照耀故宮藏洞天；大雅登堂開玉宇，嘉賓觀國赴瓊筵。  
鼎彝莊重商周紀，書帖風流晉宋年；期約當逢週末夕，高情不費世塵錢。

### 西門町

西門町內踏芳塵，語笑喧闐綺陌春；曙色已來朝訪客，暮光猶引夜遊神。  
華燈濃映紅樓古，寶月長隨綠鬢新；最是京城行樂地，尤須秉燭往來頻。

### 清明上河圖

森羅光彩管毫生，揮灑丹青寫汴京；萬戶珠璣饒市肆，九春錦繡暢都城。  
上河曾得摹精妙，下國今無開泰平；願致黎民居亦易，長如此幅永清明。

### 翠玉白菜

媧帝補天心力窮，遂遺美石落塵中；瑰奇豈獨神明德，璀璨還須鬼斧功。  
菜葉翠雕光剔透，螽蝗碧琢影玲瓏；自來良玉難藏櫃，一出能教萬巷空。

### 肉形石

肥瘦相宜聚一身，天生尤物絕無倫；東坡煮作鍋中饜，北市藏為席上珍。  
紅潤似聞香撲鼻，白鮮欲啖味沾唇；曾言肉食皆多鄙，大嚼須憐飢餒人！

### 迪化街再造

商通南北昔為魁，鼎盛何堪歲月摧；衢肆百年芳謝去，春宵一瞬夢驚迴。  
街迷暄景逢年節，樓醉古香如玉醅；合浦珠還良可待，東風有信不成灰。

### 過霞海城隍廟見人參拜月老、城隍夫人有感

渡海升霞護稻埕，蜂巢穴上播神名；香縈廟仄威靈赫，匾掛天高善惡明。  
月老牽繩求永結，夫人賜履願同行；向來此路多風雨，盼得真心望到晴。

### 陳天來故宅

精工雕築一時新，絕代風光動四鄰；不見朱門喧貴顯，空教玉砌暗埃塵。  
殘磚意冷膏粱氣，畫棟愁生錦繡春；燕子歸來如有語，可詢今主又何人。

### 大稻埕煙火節

街屋優遊喚綺思，河堤入夜更觀奇；春雷動地聲千響，瓊蕊凌霄影萬姿。  
水色流光明潑灑，風華錯彩散參差；稻埕人事皆如此，且記今朝燦爛時。

### 士林官邸賞菊

晚節唯君慰寂寥，凌寒獨立最孤標；士林秋爽催花宴，官邸庭芳逗客潮。  
青眼誰知心野逸，紅塵眾愛貌嬌嬈；鬧中能靜方真隱，高士何曾染俗囂。

### 紅毛城

雅尋陳跡作清遊，城訪紅毛又值秋；十代煙雲空想像（註），百年臺閣好淹留。  
斑斕古砲青山在，迢遞斜陽淡水流；回首興衰多少事，登臨一度使人愁。  
**註：紅毛城共歷經：中國朝代明鄭、清朝甚至短期台灣民主國而到今日中國  
華民國四個政權的朝起與朝落；也被西班牙、荷蘭、英國、日本、澳洲、  
美國等六個外國所統治過，因此紅毛城共經歷有 10 個不同朝代的主體  
或國家。**

### 南港桂花節

獨領都城遍地芳，花開金粟體輕黃；嬌分蟾月三秋色，柔散霜風九里香。  
無語深憐丰韻足，多情漫惹蝶蜂忙；仙姿欲問栽何處，南港尋幽是故鄉。

### 訪李臨秋大師舊居兼題望春風

百年丰雅李臨秋，才調縱橫誰可儔；詞賦春風傳眾口，筆揮淡水帶潮流。  
思中燈火闌珊夢，心內琵琶婉轉愁；幾許情絲難遣處，憑君此曲慰溫柔。

### 夕遊大稻埕碼頭

川面依然粼水紋，連檣疇曩密干雲；數帆船影今殘照，一縷茶香昔舊聞。  
巨港朝榮潮已落，長堤夕景意難分；斜陽慰有餘晴在，萬里江天盡綺雯。

## 七言絕句

### 北投溫泉

欲破愁寒暖客身，北投湯浴濯風塵；溫泉淨滑膚光膩，始信人間尚有春。

### 陽明山賞楓

臺北金風自好秋，陽明氣爽艷橫流；直須看盡丹楓色，始把深愁換淺愁。

### 辛苦

紅油辛辣倍添香，白玉苦瓜烹靚湯；啖苦茹辛今已慣，百般滋味是家常。

### 關渡候鳥棲地

影掠波光一面慳，高栖喜佇海濱間；翩翩鷗鷺驚聲起，飛向春郊何處閒。

### 貓空偕友品茗

驅駕貓空樂曠然，復將心事煮茶煙；茗香邀宴唯清話，囂鬧何曾到耳邊。

### 臺北茶花展詠山茶

枝如松柏生風骨，艷比牡丹留晚霞；不帶俗香蜂蝶引，清中極韻見山茶。

### 臺北植物園荷花池

高情何必盼春回，不學群芳逞艷開；遙立清池深碧處，懷香獨待洛神來。

### 選舉

賢能選舉若興兵，龍虎爭持是北城；一向看來多擾攘，幾人真肯為蒼生。